




羅浮山志

ル 5
1314
3



門 儿 5
第 1314
卷 3

門 儿 6
第 1314
卷 3





羅浮山志會編卷之四

長洲宋廣業澄溪纂輯

人物志

志內仙釋名賢照舊志登錄外凡增入者俱註出處于本名下

仙一

周 一人

浮邱公靈王時偕王子晉上嵩山後適羅浮得道因名其地廣東通志南海縣有浮邱山為羅浮朱明之門戶相傳浮邱丈人於此得道 羅浮書

秦 二人

省志陽頭祖游羅浮成云是為帝軒赫之所履神赤燦

安期生者瑯琊阜鄉人賣藥東海邊時人皆言千歲翁秦始皇帝東遊請見與語三日夜賜金璧度數千萬出阜鄉亭皆置而去以赤玉舄一鞞爲報曰後數年求我於蓬萊山始皇帝卽遣徐市盧生等數百人入海未至蓬萊山輒遇風波而還立祠阜鄉亭海邊十數處云齊人李少君自言少好道入泰山採藥修絕穀遯世全身之術道未成而病困于山林中遇安期生與神樓散一七服之卽起少君於是求給奴役師事之遂將少君東至赤城南之羅浮北至太行西遊玉門周流五嶽往返江川者數十年一旦告曰我被元洲召卽日當行汝未應隨我今當捨去也須臾有乘龍虎導數百人來迎安期生乘羽車昇天少君遂還臨淄市壽數百歲相傳蓬萊山三島浮山其一也安期生在羅浮時嘗采澗中菖蒲服之至今故老指菖蒲澗爲飛昇處廣州志白雲山有鶴舒臺傳爲安期飛昇處聚龍岡北有蒲澗澗生菖蒲一寸九節安期生服之仙去按此乃鄭安期非安期生也

桂父者象林人也色黑而時白時黃時赤南海人見而尊事之嘗服桂及葵以龜腦和之千丸十斤桂采諸賁隅之東今羅浮有累世見之者今荊州之南尚有桂丸焉

漢 七人

朱靈芝者其先大宛人後徙北谷師事太素真人受青精飢飯方餌之能一日九食亦能終歲不饑棄捐妻孥南來隱居羅浮修煉太清神丹九鼎功成日服一銖內視服氣者三十年有五色鳥銜赤龍

芝取而服之初無名字人稱青精先生至是因名靈芝復得玉珮金璫之道禮華蓋隱元之星務魁步罡叱咤風雷攝召鬼神積功累行乃白日昇天而去膺受圖籙爲太極仙卿治朱明耀真洞天其栖息處有朱子庵又有朝斗壇焉

華子期者淮南人也師祿里先生授隱仙靈寶方書一曰伊洛飛龜秩二曰伯禹正機三曰平衡方按合服之日以還少一日能行五百里力舉千斤一歲十二易其形後乃仙去居羅浮受命治泉源福

地

東郭延字幼平一字延年山陽人也自秦時隱居增城山數百歲如壯者愛嗇精神不極視大言常服靈飛散自云得之李少君煉服九鼎丹能在暗室中夜書又身生光遠照小物見其采色能役使鬼神逆知人死生一日數十人乘虎豹來迎之遂詣崑崙山仙去

姚俊字翁仲錢塘人少爲郡佐負笈至太學受業明經術災異晚爲交趾太守漢末棄官入增城山中學道遇東郭延師事之延教俊九精煉氣輔星存心之術復與神丹刀圭俊服之成道在東華宮中爲北河司命三茅志仙曹各供其職北河司命獨闕以姚俊攝之主水仙考罰

王遠字方平東海人舉孝廉除郎中累遷至中散大夫博學尤明天文圖讖河洛之要逆知天下盛衰之期桓帝嗣位聞之連詔不出使郡國上載以至京師召問低頭不答詔乃題宮門板四百餘字皆說方來帝惡之同郡故太尉陳耽爲方平架道室

旦夕事之方平在耽家四十餘年後語耽曰吾當
去明日日中發至期果卒云爲西城總真統攝萬
神常居崑崙山往來羅浮及句曲惟乘一黃麟十
數待者山海神皆奉迎拜謁爲人黃色小髭長短
中人冠遠遊冠朱衣虎頭鞶囊五色綬帶劍人多
見之嘗往句曲止吳民蔡經家遣人召麻姑姑至
謂經心邪不可教之仙道乃與度世術以其道授
茆盈而經亦尸解事詳顏真卿麻姑壇記今羅浮
有麻姑峯蓋其飛集處云漢末衡山張正禮者受

方平虹景丹法患丹沙難得去廣州爲道士遂得
內外洞徹砂兼修守一之法仙去廳室爲上仙

毛公漢初人名翁唐令狐楚云太湖中有西洞庭山
山中有毛公塢毛公道成移居羅浮山三百餘歲

弟子七十二人

羅浮書

陰長生新野人和帝后之曾祖也師事馬明生明生
以太清金液神丹授之得道入武當山石室中復
居羅浮鐵橋峯下著書九篇多言上古仙事以示
將來後人忠州丰都山白日昇天

羅浮書

三國吳 一人

葛元字孝先瑯琊人慕長生不死之道因遁跡靈嶽時欲辟爲椽辭曰蔬食被褐枕石漱流吾所願也豈以此易彼哉乃入天台赤城上羅浮遇蘇元朗授以金丹之旨或云從左元放受九丹液仙經於飛雲頂煉丹得仙號葛仙翁

羅浮書

晉 六人

鮑靚字太元上黨人漢司隸宣之後年五歲語父母云本是曲陽李家兒九歲墮井死其父母訪得李

氏推問皆符驗靚稟性清慧學通經史修身養性蠕動不犯聞人之惡如犯家諱明天文河洛書人多從受業揚道化物號曰儒林大興元年八月步道上京行達龍山見前有一少年姿容整茂徒行甚徐而去殊疾靚乘名馬密逐數里終不能及意甚異之及問曰視君似有道者少年答曰我中山陰長生也靚知爲異人拜而師事焉久之乃授以神丹尸解之法靚後爲南海太守嘗行部入海遇風饑取白石煮食以自濟靚以女妻葛洪洪居羅

浮靚晝臨民政夜嘗往來山中或語論達旦人見其來門無車馬獨雙燕往還怪而候之則雙履也後還丹陽年百餘歲卒葬于石子岡蘇峻之亂發棺無尸但有大刀而已賊欲取刀聞左右有兵馬聲乃驚走賊平之後收刀復葬之初吳興徐寧師事靚夜聞靚室有琴聲問焉靚曰嵇叔夜昔示迹東市其實兵解爾寧欲受秘術謂宜有誓約寧誓不仕於是受籙常見八大神在側遂能前知才識日異鄉縣舉爲主簿寧喜就之八神一朝去其七

惟餘一人倨傲不爲用寧問故答云君違誓吾留籙籙耳寧還籙遂不見靚之通神類此

葛洪字稚川丹陽句容人少好學家貧躬自伐薪以貿紙筆夜輒寫書誦習以儒學知名性寡默無所愛翫或尋書問義不遠數千里尤好神仙導養之法從祖元吳時學道得仙號葛仙翁以其煉丹秘術授弟子鄭隱洪就隱學悉得其法焉後師事鮑靚靚亦內學逆知將來深重洪以女妻之復傳靚業太安中石冰作亂吳興太守顧秘檄洪爲都尉

討破之遷伏波將軍洪見天下已亂乃叅廣州刺
史稽含軍事含遇害遂停南土多年始還鄉里元
帝爲丞相辟爲掾以平賊功賜爵關內侯咸和初
司徒王導召補州主簿選爲散騎常侍領國史洪
固辭不就以年老欲煉丹以祈遐壽聞交趾出丹
砂乃求爲勾漏令帝以洪資高不許洪曰非欲爲
榮以有丹耳帝從之遂將子姪俱行至廣州刺史
鄧嶽留洪乃止羅浮山煉丹嶽表爲東莞太守辭
不就在山積年優游閒養著述不輟自號抱朴子

因以名書洪博聞深洽江左絕倫著述旣富又精
于析理後忽與嶽疏云當遠行尋師尅期便發嶽
得疏狼狽往別而洪坐至日中兀然若睡而卒嶽
至遂不及見年八十一視其顏色如生體柔軟舉
尸入棺甚輕如空衣世以爲得尸解云

按廣東通志洪嘗棲玲瓏巖煉丹

巖在南雄府始興縣

弟子

黃野人隨之旣仙去復留丹於羅浮山柱石間野
人得一粒服之爲地行仙至今丹竈杵臼巖內仍
存成化辛丑郡守江上璞記畧云始興南去十里

許有山屹立平地中草木皆從石罅中出高可數十丈廣可數十畝峭拔奇怪巖洞虛明大小不一莫可名狀世傳葛洪煉丹之所又廣州郡守戴公科記畧云玉瓏巖之北有幽竇焉窅窅然不敢入入必秉燭不可直抵其奧有丹竈在焉世傳葛稚川煉丹處

又按廣西通志勾漏山在梧州北流縣城東北十五里石峯千百皆矗立特起其巖穴勾曲穿漏因名勾漏山又有勾漏洞洞前有小亭俯瞰橫塘倚

欄西顧列峯迴環舊傳爲葛真人修煉處塘前水草間產葛仙米夏月可採而食又載入仙釋傳云葛洪字稚川句容人晉咸和間散騎常侍聞交阯產丹砂求爲勾漏令嘗於北流寶圭洞修煉後成仙

黃野人葛洪弟子也洪旣仙去留丹于羅浮柱石間野人得一粒服之遂爲地行仙常行人世或有遇之者一日醉歸取煤書二詩壁上渡海而去詩載

藝文志

羅浮書

單道開敦煌人也常衣粗褐或贈以繒服皆不着不畏寒暑晝夜不臥恒服細石子一吞數枚石季龍時從西平來一日行七百里其一沙彌年十四行亦及之至秦州表送到鄴季龍令佛圖澄與語不能屈也初止鄴城西沙門法綝祠中後徙臨漳昭德寺於房內造重閣高八九尺於上編管爲禪室常坐其中季龍資給甚厚道開皆以施人人或來咨問者道開都不答日服鎮守藥數丸大如桐子藥有松蜜薑桂茯苓之氣時服飲茶蘇一二升而已自云能療目疾就療者頗驗視其行動狀若有神佛圖澄曰此道士觀國興衰若去者當有大亂及季龍末道開南渡許昌尋而鄴中大亂昇平初至京師後入羅浮山獨處茅茨蕭然物外年百餘歲卒于山舍教弟子置尸石穴中弟子乃移入石室南海太守袁宏與弟穎叔及沙門支法防共至石室口見道開形骸具在香火瓦器猶存宏曰法師業行殊羣正當如蟬蛻耳乃爲之贊康泓復撰道人傳云

梁盧者安定人嘗爲曹掾棄之行默朝三元之法太
清真人教以神丹使往名山擇明秀產靈物者丹
乃可成盧聞羅浮本出蓬島乃自會稽南行三千
里始至其山絕高爲居觀源洞尋藥修煉丹成仙
去

王佐字子陽太原祁人少知長生之道入中嶽遇武
陵黃敬專行伏氣斷穀胎息內視傳受東郭幼平
之道佐數求要言敬曰吾聞新野陰君神丹昇天
之法此真大道之極也子可從之勿以學我所爲

固請不止敬乃授以幼平之訣曰天關之中有輔
星。想而見之翁習成。赤童在焉持朱庭。指而搖之
煉身形。消遣三尸除死名。審能守之可長生。失之
不久淪幽冥。佐受而行之南來遯居羅浮內脩九
年神丹亦成又得西城總真王方平劍解之法其
劍長三尺九寸以曲晨飛精題之名日子干字良
非佩之飛行太清在山惟食桃飲石泉而已與梁
盧爲友皆能變形隱化往來蓬萊後俱飛昇

朝代失考 三人

羅浮山志會紀卷四
劉高尚真人者不知何代人嘗於雙髻峯造石壇高
百尺爲趺坐之所左右生竹葉符可以鎮虵虎壇
址至今存焉

鄺仙者亦不知何代人在羅浮默修仙道而治田耕
一日人見其騎牛入石遂不知所在今其石在石
洞

王邦叔不知何許人師張紫陽于羅浮一日紫陽謂
曰子之從我久矣於金丹之訣畧不顧及從予何
爲邦叔再拜曰匪不願也自揣元微必無此分紫
陽曰自太極旣分之後一點靈光人人有之似子
所言是蔽其明也邦叔不覺涕泗交頤辭去靜思
至夜紫陽再詣其室曰吾一尋汝便見頭目爾兩
日尋之不得何也遂滅燭而退邦叔大窘至五更
大悟遂以頌曰月照長江風浪息魚龍遯跡水天
平箇中誰唱真仙子聲滿虛空萬籟清又曰鏡明
澄靜萬緣空百萬絲條處處通斗轉星移人睡定
覺來紅日正當中紫陽出金丹圖授之邦叔遂止
羅浮後十三年坐化青華秘文稱邦叔遠師真人

能作七絕詩者
必是唐宋以後人

紫陽疑卽月窓 羅浮書

南六朝 一人

任敦字尚隱博昌人也少在羅浮學道後宋元嘉中居茅山南洞行步斗之道及洞元五符能召役鬼神隱身分形居山舍虎狼不敢觸犯嘗講學集眾敦竊嘆曰眾人雖云慕善皆外好耳未見真心可與斷金者晉杜弼得靈飛散人病能奏章起之敦受其術及居雲陽句曲洞天南通羅浮敦所居山舍西十五里有一石室西南二里復有一石室皆

容數十人西南室父老傳云有銅牛出皆銅鞮曲入至深通潢池而洞崑崙每三元齋戒之日敦往二室祈禱皆彷彿真形其道術如此

隋 一人

蘇元朗者不知何許人嘗學道於句曲得司命真秘遂成地仙生于晉太康時隋開皇中來居羅浮年已三百餘歲矣居青霞谷修煉大丹自號青霞子作太清石壁記及所授茅君歌又發明太易丹道為寶藏論弟子從遊者聞朱真人服芝得仙競論

靈芝春青夏赤秋白冬黑惟黃芝獨產於高高遠不可得元朗笑曰靈芝在汝八景中盍向黃房求諸諺云天地之先無根靈草一意制度產成至寶此之謂也乃著旨道篇示之自此道徒始知內丹矣又以古文龍虎經周易參同契金碧潛通秘訣三書文繁義隱乃纂爲龍虎金液還丹通元論歸神丹於心煉其言曰天地久大聖人象之精華存乎日月進退運乎水火是故性命雙修內外一道龍虎寶鼎卽身心也身爲爐鼎心爲神室津爲華

池五金之中惟用天鉛陰中有陽是爲嬰兒卽身中坎也八石之中惟用砂汞陽中有陰是爲姤女卽身中離也鉛結金體乃能生汞之白汞受金炁然後審砂之方中央戊己是爲黃婆卽心中意也火之居木水之處金皆本心神脾土猶黃芽也修治內外兩弦均平惟存乎真土之動靜而已真土者藥物之主斗柄者火候之樞白虎者鉛中之精華青龍者砂中之元氣鵲橋河車百刻上運華池神水四時逆流有爲之時無爲爲本自形中之神

入神中之性此謂歸根復命猶金歸性初而稱還丹也內視九年道成冲舉而去谷中有伏虎石存焉嘉靖中土人耕治其地猶得銅盃一古劍一竟毀之

唐 十三人

王體靚同州人始遊羅浮山觀源洞未有室居縫紙爲裳取竹架樹覆以草獨止其下豺豹熊象過而馴之弗害也積十年乃構草堂植茶成園犁田三十畝以供食不畜妻子少言說有所問盡誠以對

人或取其絲約酬利弗問姓名皆與或負之者終不言凡居二十四年年六十二貞元二十五年五月卒於觀源茶園村村人相與鑿木爲空盛其尸埋於園中觀原積無人居因野人遂成三百家元和四年十一月李翱以節度掌書記知循州五年正月准制祭名山大川翱奉牲牢於山致命遂使斲木爲棺命將吏村人改葬野人于佛寺南岡乃立木於墓東志曰王處士葬于此

侯道華芮城人初在河中永樂縣爲道士縣有無核

羅浮山志會編卷四
棗蘇氏女子自少獲而食之自是不食五穀年五十顏如處子經亂離後莫知其所在道華亦得食焉來遊羅浮遇異人傳錄龍虎丹訣遂得道上帝賜其姓名曰李內芝復隱峩嵒山詣中條道靖觀事周悟仙恒如風狂人登危立險如履平地又好子史手不釋卷因殿宇壞登梁葺之得小金合中有丹遂吞之後晨起飛上松樹頂道流競呼之揮手謝衆曰玉皇召我爲仙臺郎今去矣遂與雲鶴盤旋凌空而去時大中五年也蘇軾記其事曰道

華竊食鄧天師丹仙去永樂有無核棗人不可得道華得之余在岐下亦嘗得食一枚云

呂純陽號洞賓常遊羅浮至一小庵中值道士他出獨一小童在前揖曰先生在此乎遂竊道士酒以獻洞賓引滿使小童盡其餘童若不屑童素患左目內障洞賓以所餘酒嚙其目忽然開明若素無翳者乃取筆画一山形於壁山下作池三口謂童曰汝飲我酒則得仙矣不飲命也然亦當享大年言訖飛入石壁隱去及道士歸見所畫山徹壁內

外大驚曰山下三口乃崑字非呂先生乎後童百有五歲而終

江湖紀聞

李終南住羅浮山李德裕就乞仙餌終南謂曰相公好服丹砂但促壽耳懷中出一小玉象如拳曰求砂之瑩者置象鼻下俟象服而吐方可餌此乃純陽之精凝結已三萬年今以暫假惟忠孝是念母致其咎又出金象曰此牝者與玉爲偶德裕如言服之精力日壯乃御采姝凡數百人其後被遷鬼門關忽遇終南怒索二象曰不如我教固當至此

德裕行至鱷魚潭風雨大作玉象自船飛去光焰燭天金象從而入水德裕竟卒於朱崖

陶八八不知何許人顏真卿典郡江南八八請謁于道出碧霞丹授之曰七十之年君當有厄如有卽吉他日待我于羅浮山可也及李希烈作亂真卿爲盧杞所陷令單車問罪至汜水忽遇八八笑謂曰吉吉遂指嵩少而去未幾希烈僭號真卿被害歸葬偃師北山後有洛陽商人至羅浮見兩道士圍棋樹下一道士謂曰寄有家書幸達我舍立札

一封題寄偃師北山顏家商人歸詣偃師問所居
卽瑩庄也守塚蒼頭得書驚駭曰此先太師筆也
因卽致書于子若孫選吉發塚幽宮闐然共往羅
浮跡之手談故處石枰謹存而已

博物志

軒轅集不知何許人武宗好談神仙集以山人進宣
宗卽位誅趙歸真遂流集于嶺南因居羅浮人傳
數百歲顏色不老髮長垂地坐暗室目前光長數
丈每採藥於巖谷毒蛇猛獸隨之若有所衛護與
人飲酒則袖出一壺纔容一二升賓客滿座傾之

彌日不竭人命飲者百升不醉夜則垂髮於盤中
酒瀝瀝而出麴蘖之香畧無少減嘗著太霞玉書
十二篇其敘曰太上忘言其次立言流若卮言民
斯蔽矣夫執形爲有累無往而可祛悟有爲無玄
隨在而可詣故天地以無名爲妙本大道以抱一
爲真詮應萬彙而大象無形體混成而神功不宰
合符帝一超入太信之根孕元宗風宏自元始之
烝逍遙齊物則曰大鵬天籟華蓋隱元則曰玉珮
金璫得其意者象帝之先昧其真者墮身於劫獨

立而不改周行而不殆者能幾人斯我皇唐大曆之初集栖朱明之埜忽石樓前洞砉然中開眎我靈文成茲玉書結空粲以成篇洞幽寥於無朕凡我兆景慎勿以執形求也釐爲十有二章統以太霞蓋究厥守中之道原諸法象之宗云爾高上三元能妙一而不窮靈芝八景本在身而非外則此之所云皆爲芻狗其言皆道家樞要也後宣宗思之大中十一年遣使徵至長安召入問長生可致乎對曰絕聲色薄滋味哀樂一致德施無偏自然

與天地合德日月齊明雖堯舜禹湯之所以致上壽者此道也况長生久視乎及退又以金盤覆白鵲試之時集方休於外謂守人曰皇帝安能更令老夫射覆乎中人不諭其意上復召令速至集纔及玉陛謂上曰盤下白鵲宜放之上笑曰先生早知矣命坐御榻前令宮人侍茶湯集貌古而布素有笑之者則鬚髮朱唇年方二八須臾變爲老嫗鷄皮鮐背鬚髮皤然皆涕泣不已上令謝之却復故京師素無萱蔻荔枝花上因語及集於袖出之

瞻語瞻曰瞻必不第而逸於山野爾得第則勞於塵俗矣然慎於富貴四十年當有驗瞻曰神仙遐遠難求秦皇漢武非不區區也廊廟咫尺易致瞻進士登科屢歷清顯及升輔相頗著調燮之稱俄謫嶺南行廣州朝臺泊舟江濱忽有鬃角布衣少年衝暴雨而來衣履不溼欲見瞻左右皆訝乃語之但言宜哥來也以白瞻問形狀具以對瞻驚嘆乃迎而見之瞻顏貌可二十來許瞻已皤然衰朽爲逐臣悲喜不勝瞻復勉之曰與爾爲兄弟手足

所痛曩日之年今四十年矣瞻益感嘆謂瞻曰可復修之否瞻曰兄身邀榮寵職和陰陽用心動靜能無損乎今惟來相別非來相救也於是同舟行話平生隔濶一夕失瞻所在瞻乃南行卒於貶所今羅浮山中時有見之者

羅萬象不知何許人有文學明天文精通周易節操奇特以布衣遊行天下居王屋山久之後遊羅浮山愛石樓之景嘆曰此朱明洞天昔葛稚川曾栖此以煉丹今雖無鄧嶽相留聊自住泊爾乃於山

下結庵以居嘗餌黃精殮霞服氣數十年或出遊
增城泉山布水之下採藥及入福廣城市賣藥飲
酒來往無定或一食則兼十數人或不食則莫知
歲月光悅輕健日行三四百里緩行奔馬莫及後
却歸石樓庵竟不復出

許碯自稱高陽人少爲進士累舉不第晚學道于王
屋山周遊五嶽名山洞府茅山天台委羽武夷霍
童羅浮無不徧歷到處皆於懸崖峭壁人不及處
題云許碯自蛾眉山尋偃月子到此觀筆蹤者莫

不嘆其神異竟莫詳偃月子也後多遊廬山嘗醉
吟曰閨苑花前是醉鄉踏翻王母九霄觴羣仙指
點嫌輕脫謫向人間作酒狂好事者詰之曰我天
仙也方在崑崙就宴失儀見謫人皆笑之以爲風
狂後當春景插花滿頭把花作舞上酒樓醉歌昇
雲而去

申太芝字元之洛陽人徙居邵陽其母楊夢吞芝而
孕故名垂拱二年生與元宗同日稍長去俗修道
嘗遊南嶽遇異人授金丹火龍之術遂能乘虛元

宗感夢求得之名至京師言論契合命住元真觀
神遊隱顯出入不可測天寶初奉詔祭羅浮訪尋
朱明洞得之道遇異人告以九疑山舊有天樂一
部歲久化五野猪郡人捕之又化五石器太芝往
來求訪得之扣之音律相和謂其徒曰此必有異
後二十年當有應者及安祿山反形臚如豕俗謂
猪龍其子慶緒暨史思明輩貌皆豕類嘗竊梨園
樂部于凝碧池上奏之時謂讖驗云太芝道術最
高醮祭輒動風雷所著有服氣要訣世稱爲天師

亦曰仙翁肅宗卽位以其靈異尤寵幸之後坐妖
妄贓罪伏誅道流謂其兵解競傳太芝在大奈湖
山白晝冲舉宋徽宗時封妙寂靈修真人誥詞比
之嵇康至今羅浮觀中猶傳其法初開元中中秋
夜元宗同太芝及道士洪都客遊月宮過一大門
在玉光中見宮榜曰廣寒清虛之府守門兵衛甚
嚴止其下不得入太芝引帝躍起煙霧上俯視玉
城嵯峨若萬頃琉璃田仙人道士乘雲駕鶴往來
其間尋步向前覺翠色冷光相射日眩極寒下見

素娥十餘人皓衣乘白鸞笑舞於廣庭大桂樹下
樂音清麗帝歸編音律製霓裳羽衣舞曲又嘗侍
帝禁中內人張雲容稽首乞延生之藥太芝與絳
雪丹一粒曰汝服此必死不壞百年復生當遇生
人乃成仙道元和末太芝變姓名爲田山叟縣尉
薛昭夜行失道指路使往過雲容墓相覲雲容果
再生乃知田山叟卽申仙翁也

司馬退之河內人道行高潔博覽工詩居長安爲道
士元宗命往羅浮採藥住冲虛觀嘗賦洗心詩爲
人傳誦久之得藥乃還京師

蔡天一不知何許人爲羅浮道士天寶九載於都虛
觀齋會有五色雲起麻姑臺仙女縹緲而出識其
爲何仙姑也因爲作傳大歷間天一於會仙觀左
立仙姑祠事聞代宗賜仙姑朝霞帔一襲

王錫者羅浮道士嚙煉五牙返還天谷人多師之猶
不自足往來名山尋師由是爲時所重曹唐有送
羽人王錫歸羅浮詩唐字堯賓桂林人嘗爲道士
太和中舉進士中第累爲諸府從事以暴疾卒于

家人以爲羽化蓋錫與唐友皆一時奇士也

厲歸真唐末道士遊洪都信果觀見三官殿功德塑像有明皇詔以夾紵製作甚妙然主者不甚寶護多雀鴿糞穢點汗歸真於壁畫一鴿鵲鴿無復栖止後有人見歸真於羅浮仙去

後五代 一人

黃勵石晉時南漢據有百粵勵爲禎州刺史

今惠州

劉氏淫刑峻法乃棄官入羅浮水簾洞左築書院居焉亦自號曰黃野人遇仙真授以丹法修煉得

道常服黃道衣繫皂條腰懸玉瓢每投藥抹病隨手輒愈成都有魚肉道人者生於宋大觀中手足攣縮瘖不能言有異人以藥一粒納口中遂能言語動作知隱匿事遇武當孫垣先生曰羅浮山黃野人五代時惠州刺史棄官學道宜往拜之道人至羅浮緣藤上厓見野人踞坐拜而拱立野人曰子可教取魚肉與之道人自此能食生肉紹興末詔封達真先生吳興陶安世所撰蘇後湖遇黃真人記卽勵也勵至宋末猶存後飛昇去人名其書

院故址曰書堂坑

羅浮山志會編卷之四 終

羅浮山志會編卷之五

長洲宋廣業澄溪纂輯

人物志

仙二

宋 十八人

古成之字亞奭惠州河源人五季末避地增城性簡
 靜寡慾嘗結廬羅浮山力學不怠淹通羣籍中梁
 顛榜第二人有張賀劉師道者疾廣南人居其上
 乃召成之夜飲黎明臚唱成之喑不能應是科上

初唱名賜第怒其不恭命扶出之然惜其才宣諭
勉學以圖後舉端拱初成之再舉登科名在十九
都下競傳賀師道事上聞欲置于法成之申救謝
無有太宗嘆賞之初調元氏尉以能著改知青州
益都縣爲政以惠愛爲本不事刑扑而衆務集淳
化三年召試館職除秘書省校書郎張詠深器之
李順亂蜀詠出知益州辟成之知綿州魏成縣時
綿居民辟兵者多溺死子遺者皆瘡痍老幼流徙
爲墟成之旣至運米以濟饑發藥以療疾疫活者

無慮數千人立學校課農桑逆亂之俗爲之一變
咸平五年蜀又有警復以詠知益州詠以成之長
於撫恤再辟知漢州綿竹縣其政如宰魏城時嘆
曰吾竊祿以榮親今親已沒吾何以仕爲哉慨然
思歸因作思羅浮詩未幾卒于官其門人方出幹
在路見成之手携隻履云歸羅浮回家開棺隻履
存焉增城人稱爲紫虛先生肖形祀之宋末復祠
于廣州學宮所著有刪易註疏并詩集行于世四
世孫革居梅州擢紹聖元年進士官至五品

羅浮山志會編卷五
崔羽字紫霞唐州人少隸京師班直休官樂道宋高宗紹興間遊羅浮已老矣初不自言其年朱顏方曠舉止朴野性喜酒人具饌邀之飲則醉醉則歌中所言休咎皆驗後居東莞遇設醮上清觀禮畢命酌西室酬酢笑語若對客者人問之曰鍾呂陳三先生會于此既徹爵奄然端坐而逝縣人共迎置于紫霞亭焚之有蝴蝶徑尺自烈焰中騰空而去是日鄉人有識之者于榴花渡見其東歸羅浮蘇庠字養直丹陽人也後徙潤州紹興甲子中病酒

有人來謁云奉羅浮黃真人命送丹來庠未之信以丹置笥中是歲果大病氣絕家人取藥投口中卽起洒然若無疾庠建炎中喪右目瞳子至是亦瞭然矣後二十年作書與薌林向伯恭云昔羅浮異人期以數年相見應盡便盡餘不復較因往茅山別諸道友元日聚族懽飲達旦曳杖出門曰黃真人至矣其行如飛左右追挽之已立化矣

石泰字得之常州人號杏林子一號翠元子遇張紫陽得金丹之道初紫陽學於劉海蟾海蟾曰異日

有爲汝脫韁解鎖者當以此道授之餘皆不許其
後紫陽以事坐黥竄經邠會大雪與護送者飲酒
肆泰適肆中揖坐同席問其故具以告泰念曰邠
守故人也有因緣可免乃爲之先容一見獲免紫
陽德之曰子平生學道無所得聞今以丹法傳於
子泰拜謝受之苦志修煉道成作還元篇行於世
壽一百三十七紹興二十八年八月十五日尸解
作頌云雷破泥丸穴真身駕火龍不知誰下手打
破太虛空後二年易介復見泰於羅浮山

陳楠字南木號翠虛惠州府博羅縣白水巖人以盤
橪籬桶爲生浮湛俗間人無知者作盤橪籬桶頌
盤橪頌云中日盤盤團又團中間一位土爲尊磨
來磨去知多少個裏全無斧鑿痕籬桶頌云有漏
教無漏如何水泄通既然圓密了內外一真空其
言下超悟如此後得太乙刀圭金丹法訣於毗陵
禪師得景霄太雷琅書於黎姥山神人每人求符
水楠捻土付之病輒愈故人呼爲陳泥丸宋政和
中提舉道錄院事後歸羅浮以道法行於世所至

羅浮山志會編卷五
四
與人治鬼潮陽人家女苦狐厭狂易無度楠用雷符熏狐媚殺之時披髮走日行四五百里鶉衣百結塵垢滿身間食犬肉終身爛醉莫測所如然濟人利物效驗有不可掩者嘗之蒼梧遇旱人憂暵死楠執鐵鞭下淵潭驅龍起須臾陰雲四合雷雨交作境內沾足遂爲豐年過三山大義渡洪流遄悍舟不敢行楠浮笠而濟行欽管道上遇羣盜拉殺瘞之後三日盜散復蘇遊長沙衝突節帥執拘送邕州去數夕又回長沙矣中夜坐或含水銀越

宿吐視已成白金乞與其徒不顧楠自言閱世四十三然有四世見之者有翠虛妙悟全集行于世及作羅浮翠虛吟以丹法授瓊山白玉蟾其出入玉蟾常侍左右楠於寧宗嘉定六年四月十四日在漳州赴鶴會罷說與主云我當來會裏尸解主不以爲然遂作四句命玉蟾題之云頂上雷聲霹靂混沌落地無蹤今朝得路便行騎箇無角火龍彼時玉蟾隨侍在漳州梁山楠與一籬桶老子倚角入水而逝其籬桶老子先有一斧在地再尋其

斧斧亦不見玉蟾嘆曰此水解也是日有葛縣尉
在寧鄉縣見之楠與尉父爲久契因寄一書使尉
歸潮達其父後方知其尸解楠度弟子三人鞠九
思沙蟄虛白玉蟾

白玉蟾字如晦本葛長庚變易姓名世爲閩人以祖
任瓊州之日而生自號爲海瓊子又號曰蟾庵曰
武夷散人曰神霄散吏幼舉童子長遊方外得翠
虛陳泥丸之術當時士大夫欲以異科薦之弗就
也事翠虛九年始得其道每遊方外必與之俱逮

翠虛解化于臨漳乃往還于羅浮霍童武夷龍虎
天台金華九日諸山攀頭跣足一衲傲甚而神清
氣爽與弱冠少年無異喜飲酒不見其醉博洽儒
書究竟禪理出言成章文不加點隨身無片紙落
筆滿四方大字草書視之若龍蛇飛動兼善篆隸
尤妙梅竹而不輕作間自寫其容數筆立就工畫
者不能及授上清籙行諸階法攝都天大雷最著
所用雷印常佩腰間祈禳輒有異應時言休咎警
動聾俗姓名達於九重養素之褒笑而不答有願

從之遊者莫得也嘗遊西湖至暮墮水舟人甚驚
遶湖而尋不見達旦已在水上猶兀然也後至臨
江慧月寺之江月亭飲酣袖出詩與諸從遊因躍
身江流中衆呼舟人援溺玉蟾出水面搖手止之
而沒洪都之人以爲水解矣是月又見於融州老
君洞復歸於羅浮竟莫知其所終弟子彭耜號鶴
林亦至羅浮有題冲虛觀詩又張月窻者不知何
許人一號復齋又號湛然常住羅浮從玉蟾遊玉
蟾傳安樂法與之詩曰收斂精神出默然頂門一

路聚雲煙且昇陽火烹金鼎却降靈泉灌玉田交
結只於牛渚外分明只在鵲橋邊工夫九九數六
六此是人間安樂仙又示金丹訣云火金只是水
中金一物飛浮一物沉兩畔一斤同二八崑崙山

頂海波心其見重於玉蟾如此

廣東通志云玉蟾撰有羅浮山志

朱橘號翠陽淮西安慶人母嚴氏夢吞一星光大如
斗已而懷娠十五月一日有道人手持一物如橘
謂其母曰食此子生矣母喜而受之請問名氏乃
出袖中一扇上有鞠君子三字曰吾姓名也言訖

失所在移時而橘生父異之因命名橘子橘生而
聰慧有志儒業尤精易數且謂丹道造化之妙無
出於此因往惠之博羅遇道士手持一橘狀若風
狂且行且歌曰橘橘無人識惟有姓朱人方知是
端的橘遂隨至郊外拜而問曰真人非鞠君子乎
道人驚曰子何人也橘以姓名告道人曰子謂平
日所欲者何或富或貴惟汝擇之吾從所請橘笑
而答曰人生富貴如海上漚空中雲聚散何有定
據惟有長生不死之旨換骨回陽之妙可聞耳道

人因爲之說曰夫息者自心也元氣也乃虛無之
根造化之主升降離合悉從心起衆生所以迷失
本真輪回六道流浪四生者爲不能了此心爾故
古仙上人惟欲人明了此心了心則見自性見自
性則去聖不遠若此心不明了皆非正覺無上至
真人之妙道也橘恍然自失道人迺指前山一大
石約以明日早至吾當度汝橘一再往道人已先
坐於石上曰來何遲橘愧謝而退及夜半而往焉
道人遂以九鼎刀圭火符之訣五雷金書玉篆之

文九人飛神陽道之法心傳口訣付之且試令往
皖公山築室依法修煉後當有一小兒至宜以道
法傳之繼汝後也餘皆勿許道人者卽鞠君子號
九霞九霞之師翠虛陳泥丸也橘遵其教入皖公
山築室修煉後有登山者見一小兒潔白如玉浣
手庵前皖水之上其行如星及隨其所之入庵而
不知其所止惟橘儼然端坐人皆謂橘嬰兒之顯
相也橘留惠三載一日天氣嚴寒忽謂鄉人陳六
曰吾將去矣汝盍爲我圖之陳莫能測翼日橘乃
坐化於旅館中次日復甦越數日入城中又謂陳
六曰吾當立化於縣衙前陳從其言化後用泥塑
其骸聚觀者千餘人忽博羅吏執笈鞭之唯見推
泥墮地而已衆方知橘是神變而尸解云時宋理
宗淳祐六年十一月十三日也

藍喬字子升循州龍川人母陳氏禱於羅浮山而孕
及期夢一仙鶴集其居是夕生喬室有異光年十
二已能爲詩章有相者謂陳曰爾子有奇骨仕宦
當至宰相學道必爲神仙喬曰將相不足爲迺所

願則輕舉耳自是求道書讀之患獨學無友因辭
母之江淮抵京師七年而歸語母曰兒本飄然江
湖所以復反者念母故也瓢中出丹一粒曰服之
可長年無疾留歲餘復有所往以黃金數斤遺母
曰真氣噓治所成母實用之兒不歸矣潮人吳復
古遇於京師方大暑同登汴橋買瓜喬曰塵埃汚
吾瓜當於水中噉耳自擲于河吳注目以視時時
有瓜皮浮出水而齧迹儼然至夜不出吳往候其
邸則已酣寢徐開目云波中待子食瓜久之不至
何也吳知喬已得道再拜愧謝遂與執爨後遊洛
陽布衣百結每入酒肆輒飲數斗置紙百幅於足
下令人片片曳之無一破者語人曰吾羅浮仙人
也由此昇天矣一日貨藥郊外復置紙足底令觀
者取之紙盡足浮風雲翛翛躡而上昇仙鶴成羣
空中聞笙簫之音長誦李太白詩云下窺夫子不
可及矯首相思空斷腸母壽九十七而終葬之日
樵牧者聞墟間哭聲云

莫洞觀卽莫道人也容州人居羅浮石洞不知其年

羅浮山志會編卷五
歲山下父老八九十歲者自言少年已見其丰姿
今容貌鬚鬢不異於昔登山如飛遇飲而飲遇食
而食或辟穀數日不避寒暑蕭然一庵傍無侍者
常夜坐於飛雲頂有虎侍旁不去貴宦遊山求見
之多不遇輒遺以衣及贈詩焉理宗末年猶存

鄧守安字道立不知何許人羅浮道士有道者也雖
山野拙訥好爲勤身濟物之事廣惠人多愛之山
中相傳有黃野人者守安一日忽於庵前見其足
迹長二尺許時蘇軾謫惠州素重其人守安嘗於

惠州建浮橋四十舟鐵銷石砢曰東新橋以濟渡
者軾捐犀帶助役賦詩以落之守安聞人病救以
符藥又欲引蒲澗之水以飲廣州之人軾答張文
潛書云羅浮有道士鄧守安雖朴野養煉有功至
行清苦常欲濟人深可欽愛見邀之在此又頗習
醫藥極有益也

何宗一羅浮道士也蘇軾嘗與之同遊羅浮道院
胡衍號雲峯其先廬陵人宋初行醫至博羅遂居焉
少慕仙道喜施與煉藥搗三千杵成八百丸號胡

氏寶丹治疾疫全活者衆常居水簾洞師白玉蟾
行九九六六之法得道衍行六世稱胡六真人卽
玉蟾所稱胎仙也雅能詩

有宿冲虛觀
詩見藝文

卒之日舉

尸如空衣火之得舍利三十六顆大如菜豆色黃
紫事載胡氏家譜

鄒葆光少隸冲虛觀道士籍宋徽宗宣和中召至凝
神殿試以道術有七人從之倏不見上問謂誰葆
光對曰臣居山嘗習劍術此七人者古松也徽宗
異之拜金壇郎時徽宗廣求學仙之徒與工詩賦

奇女曹仙姑與吳妙明皆徵至京師仙姑明于丹
術嘗作大道歌深得意旨道流競傳誦之敕封文
逸真人每遇道流貌謂無人獨與葆光語深見稱
許故賦詩贈其歸葆光住持時有司營修宮廨捐
錢五萬贊成其事爲郡守陵江譚粹所敬禮以其
行法號爲法師後人謂仙去

鄭孺榮陽人少慕仙道聞白玉蟾在武夷擔簦往從
之至則已他適矣乃往羅浮事朱橘授以丹訣曰
氣歸臍爲息神入炁爲胎遂篤志行之自此不食

亦不饑氣力百倍以仙宮中有翠英之房道君在中而說經乃更名清愷而號翠房遂爲道士後復往三山天慶觀遇玉蟾禮爲祖師盡得其傳而後歸冲虛玉蟾贈詩云鐵作橋梁雲作蓋石成樓閣水成簾歸時猿鶴煩傳語記取前回白玉蟾

王寧素臨安人別號寶谷爲冲虛道士嘗居桃源洞圓庵趺坐不茹葷不迹戶外二十三年惠守趙汝馭嘗請其住見日庵手植杉於庵前李昉英有羅浮洞長王寧素送藥瓢詩後坐化去庵竟廢又有

梁真素亦冲虛道士也道行峻潔有詩名一時名士咸與之友先是乾道中又有無語唐道人者至羅浮請於經畧使龔茂良買庵以居唐對人不言不笑端坐竟日三人蓋有道者也

鄒師正羅浮道士也能詩文嘗主冲虛觀郡文學掾王胄遊羅浮作志師正募緣刻之白玉蟾嘗贈以詩師正頗能文嘗撰羅浮指掌圖記傳於世

梁彌仙者不知何許人朴野罕接世事號青霞道人寶祐初住廣莫庵嘗雲遊廣州居斗南堂廣帥經

畧安撫使方山馬天驥作城頭月贈之文溪李昂
英和之住持道士黎道靜和之錄爲一通跋其後
云寶祐丙辰上元日敬摸此詞於蓬萊閣一時傳
誦彌仙由是知名後又雲遊爛柯山昂英有贈曲
筇方笠詩云

雷隱翁名本貴州人少磊落不羣旣長業進士不第
卽棄去默坐終日或謂其痴笑曰終不以吾癡易
汝黠後遠遊不知所之元祐中有命使至羅浮見
嘯傲松下自道姓名云雷隱翁乃知其仙也

一統志

范嵩大陂人年二十二貧不識字土名牛特水最險
嵩日修路遇二人昇之過水二人以一丸與嵩吞
之遂開口成章常自吟云幽林獨悟少人知散步
雲霞道幾遲世界眼前惟我識逍遙墟裏作孩兒
又云鳥啼花落一天機落處啼聲最可思祇是都
忘花有相天機端的在斯時後往羅浮不知所終

元三人

郭參寥元妙觀道判也嘗至羅浮邑令趙孟傑有詩
寄之又有雲章真人齋教門經書護持道教題詩

明福法堂壁洪武初有方丘生者遊羅浮寓公給事中王佐贈之詩

三詩俱見藝文志

三人俱以方外來遊者也

明三人

蕭集虛元末爲琪林觀道士自號止庵道人後居羅浮修煉頗能詩文與五先生友善共贈以詩

徐子明博羅人明福觀道士精於元業洪武己巳被選至京賜住神樂觀預供祀者三十餘年未嘗有毫髮過失人皆重之永樂十年春正月以年毫不

能供事禮部以聞上憫其老詔許還山陳璉時爲

禮部侍郎作序送之稱其淳篤勤恪振起玄風云

梁可瀾字元叔順德人博學能詩隱居羅浮慕葛稚川修煉故事自號三十二峯太狂長嘯仙署邑令連公繼芳高其人訪諸山中訓和竟日所著有狂仙詩修真要語行世卒年八十顏色如生舉屍輕若空服葬白鬱峯後十年其姪永楚遇一黃冠踵其門曰太狂仙約返羅浮果行否言訖不見人益知其爲仙也子夢陽工詩畫篆法爲諸生亦不求

仕進

羅浮書

女仙

晉一人

鮑姑靚之女也靚得道後爲南海太守時葛洪亦以散騎常侍出爲勾漏令師事靚靚以姑嫁之其後姑與洪相次登仙于玉鸞峯至唐時人見其行灸於南海有崔焯得其越井岡艾灼贅瘤無不愈者事見裴鉶傳奇云

隋一人

徐仙姑北齊僕射之才女也不知師奉何人已數百

歲狀貌常如二十歲許善禁呪之術遊海內三江
五嶽天台四明羅浮括蒼多宿巖麓林窟之中間
寓止寺院一日有強人數輩巧言挑侮姑叱之強
輩怒欲刺以刃詞色愈悖姑笑曰我女子也而能
棄家雲水不避龍蛇虎狼豈懼汝鼠輩乎即解衣
而臥遽徹其燭其人喜以為得志姑徐理策出山
其人皆僵立尸坐若被拘縛口噤不能言姑去數
里其人乃如故姑來往江表吳人見之四十餘年
顏色如舊其行若飛所至之處畏敬若神無敢戲

侮者唐懿宗咸通初謂白鶴觀道士黃雲陶曰我
先君歷仕北朝以方術聞陰功及物今亦得道故
我庇其福以此詳之即之才之女也

唐二人

何仙姑增城人何泰女生而紫雲遶宅住雲母溪年
十四五夢神教食雲母粉可得輕身不死因餌之
誓不嫁常往來山巔其行如飛每朝去暮回持山
果歸遺其母後遂辟穀唐天后遣使召赴闕中路
失之中宗景龍中白日昇仙天寶九載都虛觀會

按廣輿記湖廣
永州懷類云何仙
姑永州產幼遇異
人與一籠食之遂
辟穀能逆知人吉
凶又按類云零
陵市人女也純陽以
一桃與之僅食其半
自是不飢云
零陵即永州也

鄉人齋有五色雲起於麻姑壇衆見仙子縹緲而出道士蔡天一識其爲何仙姑也代宗大曆中又現身於小石樓廣州刺史高翬具上其事

盧眉娘生而眉綠唐順宗朝南海貢之京師稱北祖帝師之裔自大定中流落嶺表幼而慧悟工巧無比能於一尺綃上繡法華經字如粟米又作飛仙蓋以絲一縷爲蓋五重中有十洲三島天人玉女臺殿龍鳳之象每日食胡麻飯二三合順宗召入宮內謂之神姑元和中憲宗嘉其聰慧賜金鳳環以束其腕度爲女道士放歸南海賜號逍遙大師後數年尸解香氣滿堂室弟子將葬覺舉棺輕徹其蓋惟存舊履而已後有人見眉娘乘紫雲遊於海上羅浮處士李象先爲作逍遙傳

宋二人

妙明真人吳氏本句容士人女寓杭幼遇異人得修煉辟穀訣宋徽宗召赴闕館之以禮蔡京贈之詩有姑射神仙猶飲露龜臺王母未忘桃之句旣而得請還錢塘未幾欲他往人或問之曰城中皆黑

氣可速避去纔經浹旬卽有金人之禍真人肌膚
明秀語論皆歷歷可聽未嘗觀書質以古今無不
知者後隱羅浮

單縣君號綠原道人增城石灘人以夫受封常厭俗
紛端坐讀書悟道能爲詩文後無疾而化

釋

晉 一人

支法防晉沙門也哀帝時人同袁宏登羅浮山訪單
道開石室見其形骸具在燈火瓦器尙存羅浮向
屬仙山釋教之興始此

南朝 二人

智藥禪師天竺國僧也梁天監元年自西土泛舶來
漢上至韶州曹溪水口聞水香掬而嘗之曰此溯
流上必有勝地尋之遂開山立石寶林預記一百

七十年後有肉身菩薩來此演法至唐六祖傳衣鉢于曹溪之上果符其說卽南華寺也嘗開月華寺往羅浮創寶積寺後來韶又開檀特寺靈鷲寺神異莫測朝遊羅浮暮返檀特曾通六年於羅浮受龍王請入海演法今韶州月華寺師肉身尙存景泰禪師頭陀僧也不知何許人來羅浮薙草爲室居焉始至山中其徒以無水難之師笑而不答已而卓錫于地泉湧數尺流汲不竭人號爲卓錫泉水甲於嶺南今其地爲寶積寺師嘗說法有龍來聽人號其處爲龍王坑又於阿耨池東建塔入定而逝羅浮書云師有道術役使鬼物常居山頂池上池上有蔬葉師曰此泉當與人境通因書偈於水投之偈出廣州王氏池中因捨其地爲寺號曰王園寺廣州刺史蕭譽每召與語朝遊南海暮返羅浮時謂聖僧譽因建寺於庵所題曰南樓寺遂於王園寺南樓寺韶州智果寺三處同一起浮屠亦同一日而畢師一身俱至焉又造阿耨王塔三十六所師常引虎豹以負瓦鉢入定而逝人時

見其坐山頂池上云

隋二人

僧璨卽三祖也自達摩入中國以衣鉢傳惠可璨聞之遂往見惠可拜爲門徒常往來司空山久無識之者開皇十二年壬子遇沙彌道信禮璨求解脫曰誰縛汝曰無人曰何用求解脫乎道信大悟作偈曰花種元因地從地種花生若無人下種花地亦無生璨優遊羅浮諸山復回舊址合掌而逝唐代宗賜璨謚鏡禪師

惠越禪師開皇中人有戒行雲遊至羅浮常居山巖下引虎枕其膝後人以其所居爲伏虎巖

唐七人

契虛禪師本李氏子志慕仙術一日山行爲異人棒子所導至葛穉川真人仙府真人曰汝絕三彭之仇乎契虛不能對三彭三尸也後爲僧居羅浮坐臥胎息化去

休咎禪師姓梁氏新興人唐武后時遊羅浮山乾和中節度使李復初迎師至扶胥鎮夜憩南海廟有

青衣童子曰此鎮海將軍廟也師何以至此師曰
欲見王耳童曰王暫遊海師少待三鼓雷電風雨
飛沙走石須臾天地豁明使者廷立王歸謁既王
曰適暫遊缺於迓迎師曰擬欲王捨此廟爲伽藍
王曰天遣鎮此歲多祀事烹宰無時非駐錫地當
爲別擇言竟辭去五鼓還謂師曰此去五里以楮
紙鎮四隅者是已比明師至其地建庵以居師語
王曰切聞王性嚴急舟楫遇風溺覆者衆願王勿
爲卽受三歸五戒王喜留住海光寺卒賜諡休咎

大師

乾末多羅西域僧也唐開元二十六年至羅浮以鐵
肖釋迦像浮海而去番禺天寶六年中貴人何行
成以祠事將命復迎其像歸山初鐵像輔土以具
四體祥符初住持僧彥課購金鳩工易之以鐵而
像始完

大顛姓楊氏生而神異齠齔時依止照惠元和間得
法希遷初入羅浮旋歸潮陽立禪院於雲山出入
猛虎爲隨手植荔枝千餘株以一銅壺灌之皆遍

韓愈貶潮時與往來及去留衣服與別長慶中跌坐而逝至道中有發其藏觀之了無一物惟明鏡而已

元慧禪師嘗至羅浮後居連州寺韓愈爲陽山令重其戒操贈詩吏部員外郎王仲舒貶連州司戶叅軍甚敬愛之日與之遊稱爲慧師以其嘗遊天台問焉慧曰天台山高於羅浮然海嶂隔礙四鼓後日光乃發不如羅浮之勝後復遊九疑上衡山涉瀟湘洞庭絕無資裝遠往彌厲蓋高僧云

懷迪不知何許人嘗住羅浮寶積寺營建中閣後有小白禪師者南嶽僧也嘗至羅浮有題中閣詩爲時傳誦

芝上人者不知何許人岳麓僧清範有送芝上人遊

羅浮二絕 載藝文志

宋五人

雲達禪師桂州陽朔人師事同郡禿禪師旣削髮卽遊方至筠州洞山寶禪師付以大乘之要南遊海上至黃龍洞結茅居焉學徒推戴以主師座募信

羅浮山志會編 卷五
施財修建延祥寺余靖爲之作記

普通禪師開禧甲子自曹溪來居泉源山竅地得泉於榻側味甘冷視卓錫泉無異人皆神之

德長老羅浮山僧也蘇軾有送佛面杖與羅浮長老詩

神定禪師素有戒行從師普通來居泉源山以禪定爲業諸方學道者咸宗之後名其所居曰獅子庵祖演禪師雲峯庵主也不知其所由來開禧丁卯入定庵中跏趺終日短髮金色李昉英贈以詩又與

廣帥經畧使徐清叟書又有老和尚者不知何許人常於飛雲塔下結庵以居壽逾百歲草衣木食泊然無營遊山者常以物施之惟一道者代其薪汲後亦跏趺而逝

... 皇清... 卷五 ...

... 皇清... 卷五 ...

真空禪師泉州人嘉靖間來遊羅浮止永福寺歸善
葉夢葉夢熊與相友善夢熊嘗問之曰師他日成
六祖乎曰成則今成何待他日我自成我何必六
祖夢熊奇之常以三錦囊遺夢熊曰子他日有軍
國大事乃開視也其後夢熊督師誅劉殲悖屢立
軍功多出其中秘畫以師爲姚光孝一流人云說
法訶林聽者數千衆以道行稱一日設醮令弟子

造一龕曰子將歸矣衆驚異龕成辭衆入龕夢熊
趨至復出龕揖別乃復入龕端坐三昧火發自焚
得舍利無數

羅浮書

晦杲禪師名道不知何許人崇禎間於羅浮鹿角坑
創雲水庵以居性絕慈悲喜爲人所親壽命有雲
生母老且病跪坐前哀求師憫焉向佛書咒語與
生曰明日之飛雲頂焚之此地可通帝座再拜匍
伏少間若有豐隆起帝諾之矣慎毋懼生往如教
有頃聞殷殷山下已而山上大震電繞其身生且

羅浮山志會編 卷五
冒雨走庵言狀師曰得之矣手念珠示曰如是如是母後果活至一百八歲云野人獻二瓜僅受其一野人曰道遠至誠胡堅拒我師笑指曰瓜主未獻也野人返竊緒其蔓果誤割鄰種者已卯土寇蠡起勢張甚師一日謂衆曰明日有好客至善欸之備蔬品若干酒酌若干七若干而溢其一以待次日暴客羣至問師安在僧言往鐵橋西矣請具食陳設悉符人數盜已默異問酒器素具乎曰師命特市以待諸君又問盞箸多一何也曰師言有

中途還者尋果至各私念神僧不可犯當皈依耳明日羣盜復至師遽出山門迎之衆訝曰昨避我深今奚見迓師曰而昨欲殺我苟不避重若之罪今來皈依故吾迎善信人耳皆羅拜感泣師後出巖憇南安望丫山奇峭欲居之士人曰虎穴也師曰吾聞虎解人言當往化之凌晨先往望山腰平處羣虎方戲躍而凜風颭颭射人師躡屐直前虎稍稍退坐石西向以拂子招之曰來來虎盡前俯首師爲說法手提其稍前者耳曰受戒受戒皆點

頭師又曰此古道場也地化我重興速徙勿緩虎
皆倒退丈餘聳身而竄良久寂然師乃徐還土人
歸率獵者往跡無所見矣山口有神廟能禍福人
居人獻牲無虛日師過之爲之說法是夜見夢巫
祝云已得受禪師戒矣今享我惟齋戒勿殺生命
云師居丫山十餘載臨示寂命以兩缸覆之母彌
其縫使好風常入否則悶我僧曰如蟲豸何曰我
在彼不入也滅後香氣經月如初疑入定云

本朝 四人

羅浮書

空隱禪師名道獨字宗寶博山無異禪師法嗣南海
陸氏子也生三歲母抱登樓觀蜘蛛結網瞪目久
之悲喜不禁晚自言四五十年來回憶不加毫末
其夙根如此六載失父隨母居近寺聞梵唄音過
耳成誦從老僧知見性成佛語益切嚮慕得六祖
壇經不識字懷襟袖間懇禮大士一夕拜下疲困
倒地忽覺身騰空中汗透毛孔張燈取經讀之彷彿
認是某字詢之人果然遂數行俱下年十四習
定樹下忽胸中如劈竹信口成偈云兀兀圓明體

騰騰物我如此是無生路無生更要離事母至孝
母病須山泉日肩擔走二十里母卒廬墓三年乃
以二十九歲入博山山異之呼入方丈與語竟夕
一日以倒騎牛入佛殿話命衆下語師呈頌曰貪
程不覺曉愈求愈轉渺相逢正是渠纔是猶顛倒
蟻子牽大磨石人撫掌笑別是活生機不落宮商
調山頷之始與易名登具足戒囑曰汝他時不得
辜負山僧也師掩關金輪復從黃巖一意住山無
出世念粵東宰官請住羅浮開博山法門閩人以
雁湖延師復請住西禪所至道風徧洽慈悲普熏
自節烈文章之士以至販夫竈婦無不傾心願出
門下師頗厭勞因掃博山塔杖錫還粵由海幢返
芥庵自剋去期趺坐而逝

Main body of the text, consisting of multiple vertical columns of characters, which are mostly illegible due to fading and bleed-through from the reverse side.

石洞禪師名元覺字離邛晚居石洞因以爲號焉平陽木陳國師法孫雲門宗符禪師嫡嗣順德簡氏子也夙具正信專修淨業結髮志慕上乘從宗公剃度禮鼎湖山栖霞和尚圓具以大事未明徧叅諸方往來吳越叢席承事名宿多見許可旣而歸覲首衆華林親受記荊平生坦懷接物雅量容衆禪律兼通才品竝茂四方學者多從之遊宗公示寂師繼席主法大興雲門之道會下千指未嘗輕易許可晚年厭煩劇暫別華林住靜循州一日遊羅浮道經石洞愛其巖壑高深築室居焉其徒迹刪鷺從之遊躬耕洞中有終焉志師資契合相與遊戲翰墨以文字而作佛事所著有石洞遺書咸陟堂前後集竝行於世師示寂後迹刪下山雲遊庵宇遂圯遺址尙存

羅浮山志會編卷五 終

羅浮山志會編卷之六

長洲宋廣業澄溪纂輯

人物志

名賢一

遊覽

漢一人

陸賈楚人慷慨有才辨高帝文帝俱遣使至粵說尉

佗歸漢言羅浮巔有湖環以嘉植云 本傳及南行記

晉二人

鄧嶽字伯山陳郡人後避康帝諱更名岱少有將帥
才畧爲王敦參軍轉從事中郎以討郭默功遷督
交廣二州軍事建武將軍領平越中郎將廣州刺
史葛洪求爲勾漏令將子姪俱行至廣州嶽留之
乃止羅浮煉丹又表洪爲東莞太守不就乃以洪
兄子望爲記室參軍洪居羅浮有年建東西南北
四庵優游導養著書不輟後忽與嶽疏云當遠行
尋師尅期便發嶽促駕往別而洪坐至日中兀然
若睡而卒比嶽至已不及見

袁宏字彥伯陳郡陽夏人有逸才文章絕美少孤貧
以運租自業謝尙時鎮牛渚秋夜乘月與左右微
服泛江會宏在舫中諷咏遂聽之遣問焉卽其咏
史之作也尙迎升舟與之談論申旦不寐自此名
譽日茂哀帝時爲南海太守表章行誼大興風教
徵士番禺董正學行著於南土宏奏旌其門嘗與
弟穎叔及沙門支法防共至羅浮訪單道開石室
因爲之贊併著登羅山疏焉

南朝 四人

羅浮山志會編 卷之二
王叔之瑯琊臨沂人王氏自丞相導立勳江左代有
文才晉宋之際王室多艱叔之與兄伯之共將家
口踰嶺依廣州刺史王鎮之愛羅浮邱壑之勝築
室鳳皇洞之南携子弟讀書其中自稱處士世傳
王生得仙至今王子洞猶存所著集十卷錄一卷
莊子義疏二卷

竺法真者其先天竺人歸漢遂稱竺氏祖酒泉太守
曾始家丹陽兄法深最知名法真博記修潔宋孝
建初因亂避地嶺表嘗撰登羅山疏紀其物產甚
悉著論謂袁宏疏獨以羅山爲言者羅本土山爲
君浮乃客山來傳故爾乃續宏書爲二卷

蕭譽字重孫昭明太子第二子也大同元年持節都
督交廣容桂成高合浦厓羅十州諸軍事冠軍將
軍平越中郎將廣州刺史命南海太守王勵輔之
譽嘗製羅浮銘及建阿耨王塔三十六所

章華字仲宗吳興人家世農夫至華獨好學與士君
子遊處善屬文侯景之亂居羅浮山寺專精習業
陳歐陽頎爲廣州刺史署爲南海太守頎子紇敗

乃還京師大建中宣帝使吏部侍郎蕭引喻廣州
刺史馬靖令入子爲質引奏華與俱行除大市令
直諫後主荒淫爲所殺

唐 六人

岑倫鄧州人中書侍郎文本之後隱居鳴臯山與李
白友善所謂岑徵君者也嘗南遊羅浮兼泛桂水
自春徂秋不返白依江外禪房作詩寄之詩載藝文志
常袞京兆人天寶末進士性狷介不妄交遊代宗朝
拜門下侍郎同中書平章事與楊綰同執政以清

儉自賢德宗卽位袞奏貶崔祐甫爲河南少尹帝
怒使與祐甫換秩再貶潮州刺史羅浮中閣有袞
所施田蓋其貶官時嘗至茲山也

李翱字習之隴西成紀人幼勤儒學博雅好古登進
士第元和四年楊於陵節度嶺南辟翱掌書記知
循州准祭名山大川奉特牢以祀羅浮因改葬王
野人於佛寺南岡作解惑辨之翱後歷遷山南東
道節度使

劉軻字希仁沛上人天寶之亂自淮入湘至韶州嘗

葬遺骸夢一書生來謝持三鷄子勸食之軻嚼一
吞二自是儒術精詣後居羅浮山壽春楊生講授
春秋軻杖策從之遊數年乃詣長安馳書馬植曰
楊生以著書爲道者也三代聖王死其事盡留于
春秋春秋之道軻以不下床求之求之必謀吾所
傳不失其指每問一卷講一經說一傳疑周公孔
子左邱明公羊高穀梁赤迴環在坐假生之口以
達其心也植見所爲文曰韓愈之流也貢舉試玉
聲如樂詩遂登進士第歷官史館至侍御史軻居

羅浮時所著有三傳指要

劉禹錫字夢得中山人登博學宏詞科工文章淮南
杜佑表管書記入爲監察御史以附王叔文貶外
遷連州刺史至羅浮山登飛雲峯頂觀半夜日出
有詩紀勝後以裴度薦爲禮部郎中集賢直學士
李羣玉字文山澧州人好學善書工詩律裴休觀察
湖南厚延致之大中間詣闕上表語頗訐直宰相
崔鉉進其詩三百篇聲譽大著尋以進士除宏文
館校書郎東歸之日遍遊嶺外至清遠峽作將遊

羅浮登楞伽臺留別羽士詩廣州之蒲澗亦有其
題詠嘗夢入黃陵廟恍若有物告以死期潯陽太
守段成式志其事二年後果卒於洪井

宋二十七人

陳堯佐字希元閩中人咸平中以言事謫潮州攝惠
事誠信簡約吏民畏服手植荔枝人謂之將軍樹
嘗遊羅浮愛其山水之勝留題甚富余靖爲之序
余靖字安道曲江人少博學能記經傳子史下至雜
家陰陽律曆佛老之書無不精究擢進士爲贛縣

尉以書判拔萃改將作監丞除右正言與歐陽修
王素蔡襄俱爲諫官時稱四賢又使契丹坐諧語
出知吉州還鄉里謝客者六年而儂賊陷邕州嶺
南騷動起靖經畧西路嶺南平遷工部侍郎謫官
時至羅浮有五色雀龍潭諸詩載藝文

周敦頤字茂叔道州人熙寧元年爲廣州轉運判官
提點刑獄洗冤澤物不憚勞苦雖瘴癘險阻亦緩
視徐按嘗遊羅浮坐臥白蓮池上樂而忘返後以
疾求知南康軍去學者稱爲濂溪先生

蘇軾字子瞻眉山人士父洵弟轍俱以文章雄一世天下稱爲三蘇擢進士又對策入三等英宗在藩邸卽聞其名欲以唐故事召入翰林宰相不可乃以爲直史館通判杭州徙知密州皆以能著又徙徐州治水有功及知湖州以表謝上言事者摘其語以爲謗訕遣官逮赴御史臺獄神宗薄其過責置黃州司馬光相哲宗起軾累擢中書舍人除翰林學士承旨紹聖元年坐草責呂惠卿制直言其罪安置惠州聞命卽行以少子過自隨至九月遊羅浮山明年復遊四年以瓊州別駕安置昌化留家羅浮之下元符初北還過字叔黨亦有文名時稱爲小東坡云

唐庚字子西眉山人善屬文舉進士張商英薦其才除提舉京畿常平商英罷相庚亦遇貶安置惠州有二賢贊及卓錫泉佛迹石記

張愈字少愚益州郫人雋偉有大志宋寶元初上書言邊事其論甚壯用使者薦除試秘書省校書郎願以授父顯志而隱於家文彥博治蜀爲治青城

山白雲谿杜光庭故居以處之六名不應遂浮湘
沉觀浙江升羅浮買石載鶴以歸杜門著書卒其
妻誅之曰不貴人爵知命樂天脫簪散髮眠雲聽
泉清意何窮真言自得放言遺慮何榮何辱

吳復古字子野潮陽人志趣超逸以父瘞遜于庶兄
居父母憂廬墓三年一見蘇軾便論出世法以長
生不死爲餘事以煉氣服藥爲土苴問養生對以
二要曰安曰和及軾南遷會真陽無一言及得喪
休戚事獨曰邯鄲之夢足以破妄而歸真今子目

見而身履之亦可以少悟矣嘗去其妻子築庵麻
田山中絕粒不食軾爲之作遠遊庵銘人因稱爲
吳遠遊焉待制李師中於世少所屈獨見復古稱
曰白雲在天引領何及軾弟轍暨一時名士皆傾
下之紹聖丙子至惠州同軾遊羅浮軾安置儋州
復古復造訪後與諸友自番禺餞軾北還至清遠
峽忽病軾問之默然微笑而卒軾嘗與書曰少時
在冊府嘗及接見先侍講下風死生契濶相遇江
湖感嘆不已其子芑仲能文善書嘗作歸鳳賦軾

甚稱之

孫載字積中崑山人登進士歷仕府縣有聲神宗以載姓名付中書除廣東常平觸暑行部以宣德意嘗至羅浮有景泰禪閣詩元祐初歷廣東轉運判官知亳州爲治務大體時號循吏以薦元祐黨人授提舉洞霄宮大觀中以朝議大夫致仕時年已七十二家居遊詠甚適一日徧謁先隴及嘗往來者未幾疾革問日早晏盥手焚香而逝人謂仙去祖無擇字擇之上蔡人進士高第歷提點廣東刑獄

嘗遊羅浮尋擢廣南轉運使

陳偁字君舉沙縣人以父任補太廟齋郎至知惠州歲早教民以牛車汲水入東湖以溉田民德之名其橋曰陳公橋惠人爲立祠子瓘字瑩中號了翁嘗著尊堯集謂紹聖史官專據王安石日錄變亂是非不可傳信深明誣妄以正君臣之義奸黨惡之徙台州卒父子皆遊羅浮有詩

羅從彥字仲素南劍人少聞同郡楊時得河南程氏學慨然慕之時爲蕭山令徒步往學焉時喜曰惟

從彥可與言道時弟子千餘人無及從彥者嘗與
時講易至乾九四爻云伊川說甚善從彥卽鬻田
走洛見頤問之頤反復以告從彥曰聞之龜山具
是矣乃歸卒業嘗采祖宗故事爲遵堯錄紹興壬
子爲博羅縣主簿兼尉於羅浮山澄心靜坐窮天
地萬物之理究古今事變之歸尤爲切實卒於官
無子後數年族人羅友判惠護其喪歸葬學者稱
爲豫章先生

張宋卿字恭父博羅人性警敏強記或借書於人一
閱還之輒成誦不忘嘗與留正講學于羅浮紹興
丁丑以春秋冠南省擢進士第除秘書省正字遷
校書郎正色立朝權貴欲納交者謝絕之由是名
重縉紳仕至肇慶郡守卒鄉人祀于惠之聚賢堂
留正字仲至清遠軍節度使從效遠孫也其先泉州
人歸善處士徐叔實以女妻之因家焉嘗寓水簾
洞及梅花村登進士第宰相虞允文薦其才得召
對言國家右文而畧武備至敵人長驅而不能支
今當改轍使文武竝用孝宗嘉嘆知徐州陞辭言

士大夫名節不立國家緩急無所倚靖康之禍死節者少因亂謀利者多今欲恢復當崇尚名節上益喜累遷端明殿學士同知樞密院事孝宗密諭內禪意拜右丞相一日奏事皇太子參決侍立上顧謂太子曰留正純誠可托光宗受禪進左丞相正謹法度惜名節毫髮不可干以私引趙汝愚與共政孝宗崩光宗以疾未能執喪正與同列屢奏乞早正嘉王儲位不報卽上表出國門去寧宗卽位召還進少傅韓侂胄浸謀預政數詣都堂爲正

所沮侂胄怨使諫官劉彥秀論正褫職後復觀文殿大學士以光祿大夫致仕封魏國公薨年七十六水簾洞有張留書院正與張秘書講學處也

陳鵬飛字少南永嘉人紹興中進士遂於經學秦檜子嘗從之遊在禮部時熺爲侍郎文書不應令鵬飛輒批還之熺寢不平鵬飛說書崇正殿因論春秋母以子貴言公羊非檜怒謫惠州面湖築室以居遊戲翰墨人得尺牘皆寶藏之孤立介處不容於時竟卒於惠有羅浮集十卷行於世

鄭玠字太玉滇陽人嘗慕羅浮之勝淳祐甲辰知博羅縣事賦詩志喜遂結廬幽居洞後讀書聽松濤以爲樂嘗言羅浮自王野人後又有黃勵真人棄官得道亦稱黃野人於是自稱幽居野人云時有逍遙子者不知何許人不言其姓名但自稱逍遙子常住茶庵後人名其所居爲逍遙庵所著有內旨通元訣三卷貫通蘇元朗之旨而附以嵩山浮丘公原道歌玠知其異人也相與唱和爲神明之交及玠擢大府寺丞逍遙子亦不知所適咸淳中

玠子康佐知惠州乃闢庵爲鄭公書堂其嘲咏泉石墨跡猶存塑玠與逍遙子像謁祭賦詩

陳知柔永嘉人罷臨賀州歸留惠陽三年臨豐湖登

白鶴峯追和東坡詩陶寫羅浮風物殆盡

留筠宰相正次子代兄恭爲廣帥俱稱良吏嘗遊羅浮陟岵興思子元崇亦嘗爲廣帥機宜時至羅浮遊咏有大漢橋卓錫泉慈濟庵諸詩從弟元長與白玉蟾同師陳楠

李南仲滇陽人中神童科嘗作羅浮山賦

賦載藝文志

趙汝馭永嘉人淳祐中守惠政尙安靜四境肅然嘗

闢羅浮徑路登者便之有山行記及諸詩

載藝文志

楊萬里字廷秀吉水人中進士第爲零陵丞時張浚
謫永勉以正心誠意之學萬里服其教終身乃名
其齋曰誠浚入相薦之尋提舉廣東常平茶鹽盜
沈師犯南粵帥師往平之孝宗稱爲仁者之勇就
除提點刑獄嘗遊羅浮終寶謨閣直學士

李昉英字俊明番禺人少雋穎書史一覽成誦文思
絕人寶慶丙戌試南省第三人時方諒陰遂賜進

士及第調汀州推官以討賊功特遷太學博士戊
卒叛帥守曾治鳳航海潛去觀文殿大學士崔與
之家居使昉英結城諭賊賊退事聞除大理司直
召對賜金嘉其瞻畧遷著作郎兼屯田郎首言天
變上納之淳祐初上言史嵩之罪擢右正言上謂
宰相曰李昉英去人無黨中外頗畏憚之嵩之服
闕謀復任昉英始以奏嵩之罪浮四凶不報再疏語
益切上卽與嵩之宮觀復劾陳鞞趙與憲引裾跪
奏上怒拂衣入宮疏御榻再拜而退有旨在外差

遺知贛州又改漳州尋復召用累官吏部侍郎又
論董盧二巨閹竊弄威福留疏拜辭遂與御史俱
出國門歸鄉後往來羅浮篇咏頗出有文溪集
敖陶孫字器之福清人少倜儻有大志弱冠魁鄉薦
韓侂胄逐朱文公陶孫首以詩送之趙汝愚謫死
陶孫哀之以文又揭詩于通衢有云九原若遇韓
忠獻休說渠家末世孫侂胄誅死陶孫登進士第
爲廣東運判嘗遊羅浮有懼庵集

宋煜莆田人淳熙間知循州養士弭盜督將倚之尋
改知惠州懲豪姓減重額刷逋戶剗虛籍惠人德
之嘗遊羅浮賦詩士民傳誦

王胄字希戴清源人以春秋擢省試第一登進士調
惠州教授嘗輯羅浮山志白玉蟾作華清引謝之
羅浮山水之勝題詠殆遍

吳與字可權漳浦人徙居龍溪歷四會餘于今有循
良風累遷奉議郎通判潮州嘗遊羅浮有詩

明 十六人

孫贊字仲衍號西庵南海人豪邁秀偉於書無所不

讀少負節槩不妄交遊耕夫販婦望而目爲孫先生云元季避亂洪武初設科取士黃中高選往遊羅浮賦咏久之乃北上旣筮仕猶作憶羅浮詩遷翰林典籍學士宋濂樂韶鳳承旨詹同稱許之日侍上左右奏對敏便而容觀飄逸居翰林三載力求補外無何以事逮繫有旨輸左校築牆望都門嘔吟爲粵聲督工者以聞召至所作詩皆忠愛語特命罷歸田里又召拜蘇州府經歷以事謫遼東時梅思祖節鎮三韓素聞黃名迎致家塾忽罹黨禍天下寃之黃嘗結詩社於南園與待制黃哲給舍王佐長史李德處士趙介爲友所作咸有魏晉盛唐風格嶺南學者宗之稱爲五先生

陳璉字廷器東莞人幼聰敏喜學以鄉薦入太學選爲桂林學教授陞國子助教永樂初召試優等擢知穎州又改滁州成祖巡幸北京訪問民隱異效者超擢焉衆言璉績最深滁人恐失之詣闕乞留遂知揚州府陞四川按察使建言修武備慎刑罰明禮制復義倉正風俗等九事嘉納之名還改南

京通政掌國子監事禮部左侍郎致仕璉德行淳懿文詞典重所著琴軒集歸田藁若干卷有萬卷堂所儲多秘館所無者璉家去羅浮不遠嘗與都帥王清往遊賦詩其守滁時得羅浮志於神樂觀道士鄧能宗因增修之爲十卷

李顥字思誠博羅人正統進士歷官所至著能聲天順四年以山東布政使入覲詔簡天下諸司府州縣官操履端嚴政績超卓者得十人顥與焉賜金織襲衣宴于禮部還任以憂歸服闋促起浙江視

事時值歲暮顥往登羅浮優游賦咏乃行有憶羅浮詩擢工部右侍郎嘗督築盧溝河天津迤北一帶河口及錢塘堤岸五千餘丈乞休抵家而卒

李承箕字世卿湖廣嘉魚人中成化鄉試與兄承芳弟承勛竝知名聞白沙先生倡道江門之上挈其子姪來從學先生甚器重之築楚雲臺以館焉承箕亦以豪邁自負飲酒多而不亂爲詩文奮迅逸宕類其爲人嘗遊鐵橋石樓諸峯至夜擁蔽木葉以居有遊山記及紀遊諸詩所著大厓集二十卷

黃畿字宗大香山人性至孝年十六補弟子員累舉
不第遂棄去讀書羅浮研九流明五行雖星氣象
數之書軒岐釋老之學無不詣其樞與旣而讀邵
子皇極經世書深契其旨作皇極管窺十三篇晚
年潛心大易中庸曰中庸易之疏義也太極通書
定性西銘猶中庸也乃述易說數篇畿幼時每調
息以凝精液夢遊清虛之府見真仙焉及壯夢一
冕衣裳者貌崢嶸如龍蜃可怖再拜告曰我鍾山
神也七七之數公當爲吾主人覺猶環佩璆然發
書占之曰吾他日其旅殯乎正德癸酉與子佐計
偕如京師至玉峽而病笑曰七七之期至矣沒年
果四十九所著有皇極經世書傳及三五玄書
歐陽鐸字崇道泰和人正德戊辰進士知福州府巡
院以文學薦擢督學副使來羅浮紀遊賦詩登眺
留連信宿而去

陳獻章字公甫居新會之白沙村自幼警悟絕人讀
書一覽輒記嘗夢拊石琴自號石齋晚年築碧玉
樓以居雅慕羅浮之勝而未得往忽夢長髯道士

羅浮山志會編卷之
囊貯羅浮山遺之因有臥遊諸咏兼寄湛民澤詩
後以真儒從祀學者稱白沙先生

廣東通志

林光字緝熙東莞人年十七卽潛心理學成化己丑
會試京邸中師事陳白沙語大合白沙弟子百餘
人首推緝熙次甘泉云由平湖教諭遷國子博士
襄王府長史典試閩楚兩闈又同考順天嘗遊羅
浮多題詠著有南川集

廣東通志

湛若水字元明增城人生而穎悟宏治壬子以書魁
東省從陳獻章遊嘗屏后一室潛心理學超然遠

到過南昌謁莊杲論學亟見獎許赴留都讀書辟
雍祭酒章懋課以晬面益背論奇之乙丑試禮闈
第二選庶吉士授編修時王守仁在吏部相與講
明正學而修撰呂柟輩皆往來辯論一時學者稱
爲甘泉先生大開講席有甘泉問辨等書丁母憂
廬墓三年產異瓜九實相連人謂孝感所致服闋
謝病復都講於羅浮西樵作心性圖以示學者尋
遷南祭酒益肆力於道學晉禮部侍郎上天德王
道及聖學等疏大指謂天德王道根於慎獨正與

聖諭敬一相發明也嘗著獻納篇格物通以補大學衍義所未備累遷南京禮吏兵三部尙書安南議興上治權論人偉其策會炳臣受莫酉賂寢不行進所註二禮疏亦爲忌者所沮兩滿二品考以老乞致政慕羅浮之勝構精舍於朱明洞建書院於青霞谷自撰羅浮志一卷其設教以隨處體認天理爲宗指曰此吾六字符也勿忘勿助其庶幾乎從遊者三千餘人呂柟蔣信其最著者所著心性書遵道錄樵語古小學四書測五經測楊簡折衷非老子及甘泉大全集皆以羽翼聖經也晚居天關置講田以贍四方來學卒年九十有五隆慶初贈太子少保諡文簡

薛侃字尙謙揭陽人學於陽明先生最篤信第進士不急仕進母強之仕嘉靖間官行人司正建言復舊章早定皇儲以安天下爲讒所間廷鞫除名歸與里中子弟講學不輟嘗遊羅浮遷豐山永福寺縉紳同志每就訪焉侃接引不倦客或坐久當食卽盥瓠菽以進對啖甚甘其直率如此至遊湖歌

詠則灑然物外也論學宗良知以萬物一體爲大以無欲爲至質性剛柔隨病而藥時從遊者數十人而李鵬舉葉萼尤日侍講席精於易每靜夜與二子說之東莞學者迎居玉壺洞一載還惠在惠前後四年歸揭陽卒有圖書質疑經傳論義中說西湖記行世擬著魯論真詮未成又十餘年萼得其藁追續成之

廣東通志

吳紳號一庵莆田人官至應天府通判以子日強令博羅慨然慕羅浮之勝至官舍入朱明樂之徘徊

不能去日強爲構亭其地而講學焉嘗與邑人周坦同遊坦以鄉舉作縣歸喜談理學相見甚懽初至時楊起元聞其名以書達大畧論學問求放心答曰夫所謂心者虛靈純粹乃爲道心又曰真心由此真心克之可以塞天地爲堯舜若但以泛然知覺者爲心則告子生之謂性之誤其究至於認賊作子宜其愈求而愈放也就養三載惠人稱其慈孝可風云日強隆慶舉人知博羅政尙廉察百姓莫敢欺尤加意學校闢羅浮別洞於長壽宮後

築靜觀書院于豫章祠傍以爲多士講學之地貧士困于婚葬者輒捐俸助之索廢寺田若干請爲學田以贍貧士邑人至今稱焉

博羅志

何宇新字子完博羅人性至孝親忌日悲慟不食葬親躬率子弟負土成墳廬于墓側形毀骨立夜有二虎蹲其門曉卽散去或有危疾歸虎亦去疾愈還墓廬虎又來其廬前嘗有慈烏翔集陳白沙爲詩美其事又書卓行二字贈之有司以孝狀聞於朝詔旌其門宏治二年登賢書官至宗人府經歷

嘗招白沙遊羅浮有詩

博羅志

黎民表字惟敬從化人貫之子自少穎異九歲習舉子業十三補邑諸生二十領鄉薦屢上春官不第慨然有隱羅浮之志以母促之仕始就銓授翰林孔目轉吏部司務辦內閣制敕房事擢南京戶部主事監通州倉轉餉雲中行至天雄召還侍經筵預修世宗實錄成晉郎中加四品俸修玉牒復修穆宗實錄成進河南布政司叅議仍掌制敕事萬歷乙卯春乞致仕疏三上得允民表賦性坦率無

城府雅好讀古書過目成誦上自墳典下迄百家
稗史罔不涉獵以故爲文自成一家方弱冠才名
籍甚嘗師香山黃佐佐雅重之居清泉山中開社
日與弟民衷民懷友人吳旦梁有譽歐大任唱和
其間明白五先生以來詩學復振海內名流如文
徵明王世貞兄弟李攀龍徐中行宗臣吳國倫皆
以意氣相友善尤精於繪事真草隸篆咸詣其至
徵明嘗語人曰隸書嗣吾後者惟敬也居恒以淡
薄自甘家居貧素惟富於文墨嘗與修廣東志從

化志羅浮志所著瑤石山房稿北遊稿論後語錄
養生雜錄行于世

陳堂字明佐南海人萬歷進士官至光祿卿築別墅
于浮邱之麓名朱明館易簣前以籃輿徧歷羅浮
諸峯賦詩數章歸後事葬期手自裁定談笑而卒
著有朱明館稿羅浮書

葉夢熊字男兆號龍潭歸善人嘉靖乙丑進士累官
兵部尙書卒贈少保公平寇虔南討叛西夏屢著
邊勳謙讓不伐林御史培稱公不作三代以下人

物著有關西漫稿戰車錄詩文集嘗遊羅浮

山囊

楊起元字貞復號復所歸善人萬曆丁丑進士累官
吏部侍郎公性純孝潛心理學師事盱江著有證
學編證道書義楊子學解楊子格言楊子政序論
學存笥稿輯白沙語錄詩文集遊羅浮有詩

名賢

隱逸

唐 三人

楊環南海人力學工詩隱居羅浮咸通末進士嘗夢
登高臺耘草得玉麟及除宏文館校書郎人賀曰
子居是職所謂耘臺麟閣也始悟所夢拜官後時
事日非拂衣歸隱周繇有送楊校書歸廣南詩
黃隱居者不知其名流寓羅浮與許渾交渾集有送
黃隱居歸南海詩

孟雲卿河南人元次山送孟校書詩序云雲卿與次山同州里以詞學相友少次山六七歲晚愛羅浮往而不歸

羅浮書

宋一人

潘預字晉卿博羅人博學該洽尤邃於易三山林東負時名少許可及抵羅浮見預論先後天之旨遂為之屈宋乾道間龔茂良帥廣聘至番禺教士南州經學自是日盛

明十三人

黃哲字庸之番禺人姓好山水結廬菖蒲澗往來羅浮峽山南華窮極幽異有何景先者東莞伯何真之子洪武初翰林待制號羅浮樵隱哲作歌贈之

李亨字嘉會博羅人永樂中鄉舉官國子監學正博

學能文有遊冲虛觀及梅花村詩

博羅志

謝仁字元夫博羅人弘治間舉人同知寧波府忤權貴被構調浙江市舶提舉罷歸隱居羅浮歲大稜傾粟以賑鄰里常入梅花村與田夫孺子婆娑其間人不知其為仁也圃于東郊每出城黃雀羣集

其笠及歸亦如之與狎鷗事頗相類

博羅志

黃佐字才伯號泰泉香山人父畿以學行名佐弱冠舉鄉試第一作九州問以見志潛心理奧至忘寢食登進士選庶吉士授翰林編修嘉靖初上政要疏及修新政疏出爲廣西僉事提督學校風化大行聞母病卽日棄官去督府劾其擅離職守坐免旣歸卜築粵洲草堂學者多從之遊吏部尙書許讚疏薦海內名士十人佐與焉起除中允作六經政要箴克講官遇事規諷改南京祭酒頒五倫條

約轉少詹事兼侍讀學士致政歸從遊益衆日錄所聞名曰庸言晚歲謝病隱羅浮撰羅浮圖經一篇修志一部嘗作鄉禮寓保甲之法卒年七十七佐學問該博與廖道南齊名所著禮樂典翰林志廣東廣西志南雍志革除遺事泰泉集詩經通解春秋傳意明音類選諸書

龐嵩字振卿號弼唐南海人嘗講學羅浮年五十三致政乃請爲甘泉弟子甘泉及門四千餘人然以爲求友于南獨唐一人而已葉綱齋云先生質行

諸儒不能逮也少司馬黃衷建黃龍精舍延高教授鄉子弟教人要而不煩

羅浮書

韓鳴鸞字伯雝博羅人年十三從父謁選父疾求醫醫力竭謬曰非人肉不療也遂割股和羹以進股瘡甚幾殆紳士嗟嘆爲詩謌贈之天懷清曠往來羅浮興到卽宿絕頂觀日初出狀以爲常足跡所及輯爲羅浮圖志邑令舉蜡賓不應李叅藩請一見以敦夙好曰吾將分庭而見節使非受塵之義將蒲伏而見故人故人其謂我何士論高之後觀

察使旌其門曰隱士之廬弟鳴鸞字伯舉舉于

鄉不仕常居羅浮鳳凰谷

博羅志

洗桂奇字奕倩南海人嘉靖乙未進士工部主事時夏貴溪當國諸司震懾桂奇與語不屈疏乞終養嘗師湛甘泉同訪匡廬白鹿奉母居羅浮青霞洞革履布服無異野人

葉春及字化甫歸善人領嘉靖壬午鄉薦隆慶初授福清教諭未赴伏闕上書論時政一日端治本二曰正士習三曰糾官邪四曰安民生五曰足國用

其目二十有五縷縷三萬餘言都下翕然謂劉蕡
復出遷惠安令以文章飾吏治毀淫祠五百區擢
守賓州軍民詣闕保留撫臣亦疏請不許既而忌
者匿賓州檄令不得赴則罪以逃遂和陶潛歸去
來辭拂衣歸羅浮治逃庵而居有司爲闢石洞書
院置田贍從遊諸生屢登薦剡遷戶部郎中權稅
都下請覈九邊屯田具疏未上卒春及剛方廉介
學行表表一時爲文高古雄偉出入秦漢所著綱
齋集肇慶順德永安惠安諸志

譚清海字永明東莞人嘉靖初以布衣上十事於朝
當路阻之穆宗卽位復上三大禮疏一日復建文
二日正景廟三日議獻廟不報大學士張居正都
御史龐尙鵬稱爲當今奏議第一將留之讀中秘
書清海固辭家近羅浮每翱翔見日臺間自稱見

日山人

東樵識

胡世祥字光甫博羅人與葉春及同舉于鄉皆嚶嚶
道古光甫以南曹郎歸卜築羅浮邑令鄧以誥嘗
曰吾兩人入羅浮始得胡曙庵一面真今之古人也

春及時亦以知州罷歸居石洞人稱羅浮二高博羅志

張萱葉春及之友也春及隱居石洞垂二十年萱數過之必偕宿聚霞峯上夜半見日而後返歲以爲常後携弟萃讀書遺履軒中壬午同舉於鄉萱官中書得讀秘閣藏書於諸經百氏靡不沉淫讐訂號博物君子家藏萬卷丹鉛無不徧及所著有秘閣藏書錄彙經彙雅北雅彙史史餘疑耀五經一貫古文奇字字觸六書故古韻雲笈七箋唐摭言

三朝政要聞見錄西園存稿西園類林八宅周書陰宅四書凡千餘卷語人曰世人貴遠而賤近吾且藏之羅浮石室中百世下有同好者俟之不爾吾當還之於造化廣東新語

韓晃字賓仲號青嶼萬曆庚子舉人授浙江青田知縣政尙寬仁清操如水任滿歸休杜門著述修羅浮野乘一冊至羅浮深相契合頌古答偈有夢遊唱和集一卷晚年治圃構亭扁曰閒笑題一聯云世事無憑過眼總石火電光堪笑他黃梁未

醒區錄有盡會心惟花香鳥韻儘教我白晝常閒
甲申聞國恤遂絕粒不食惟日啗蓮子數合尅期
沐浴而逝壽七十七羅浮野乘稱第七洞天樵史
韓光源臣清父者卽晃也兄晟字寅仲著有羅浮
副墨今不傳

祁衍曾字羨仲東莞人也居羅浮自稱羅浮山人舉
萬歷丙子鄉試不仕性通脫負不羈由朱明入閩
謁考亭於武夷因自鵝湖之白鹿洞大困於西昌
從二僮行乞於市有乞食文甚奇義不受貴遊富


賈周也最善葉化甫化甫隱居石洞與唱酬甚久
詩墨淋漓徧灑巖谷間好事者往往傳之

山囊

羅浮山志會編卷之六


終

隱逸



羅浮山志卷五

五



一
羅
浮
山
志
金
言
卷
六

六

